



Fernand ETGEN
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 24/04/2023

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un de Minister fir Mobilitéit weiderzeleeden.

Lescht Woch gouf den neie Park&Ride zu Rodange offiziell ageweit an opgemaach. Dëse P&R soll dofir suergen, dass manner Leit mam Auto an d'Land fueren, mee hiren Auto hei stoe loosse fir mam Zuch oder Bus weider op hir Aarbechtsplaz ze fueren. Souwuel Frontaliere wéi och Awunner aus Lëtzebuerg kënnen de Parking dofir gratis notzen, 24 Stonne laang.

Fir dës gratis Offer kënne wouerzehuelen, mussen d'Leit awer eng App eroflueden an erlaben, dass dës App ee GPS-Tracking vun hinne mécht. Wien sech manner wéi 1,5 Kilometer vum Parking ewechbeweegt an duerno zeréckkënn, dee muss de Parking bezuelen. Dës Method fir Parking-Abus'en ze verhënneren entsprécht net engem Prinzip vun Datespuersamkeet. Aner Parkingen, wéi z.B. de P&R Bouillon, hunn dëse System net an trotzdeem ginn et hei keng Abus'en, well de Parkingsticket maximal 24 Stonne laang gëlt ass.

An deem Zesammenhang wéilt ech dem Minister dës Froe stellen:

1. Kënne Leit, déi net wëlle vun der App getracked ginn, aner Méiglechkeete benotzen, fir vun der gratis Offer ze profitéieren?
2. Wéi laang ginn d'Donnéeë vun der CFL-App gehalen a wou ginn se gespäichert?
3. Wien huet Accès op d'Donnéeë vun der App a fir wéi eng aner Zwecker, wéi d'Kontroll vu Park-Abusen, gi se genotzt?
4. Kënnen d'Donnéeën, déi d'App sammelt, genotzt ginn, fir Bewegungsprofiler vun de Leit unzeleeën?
Falls jo, ass dat de Modell vu Dateschutz an Datespuersamkeet vun dëser Regierung?

Mat déiwem Respekt,





GOERGEN Marc
Deputéierten

